

Broj predmeta :  
Broj akta :  
Gračanica,

Na osnovu člana 34. Zakona o radu Federacije BiH („Službene novine Federacije BiH“ broj : 26/16, 89/18,44/22 i 39/24), člana 13. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), člana 16. Statuta Grada Gračanica („Službeni glasnik Grada Gračanica“ broj: 01/23) Gradsko vijeće Gračanica, na sjednici održanoj 2025. godine, d o n o s i

### **ODLUKU**

o obavljanju stručnog osposobljavanja nezaposlenih osoba visoke stručne spreme sa područja grada Gračanice u organu uprave i pravnim subjektima iz javnog i privatnog sektora

#### Član 1.

Ovom Odlukom utvrđuju se uslovi i način na koji lica koja imaju završen VII stepen stručne spreme ili visoko obrazovanje prvog, drugog ili trećeg ciklusa Bolonjskog sistema studiranja koji se vrednuje sa najmanje 180 ECTS bodova, a koja se nalaze na evidenciji Službe za zapošljavanje, mogu biti angažovana na stručno osposobljavanje bez zasnivanja radnog odnosa po raspisanom Javnom pozivu.

#### Član 2.

Stručno osposobljavanje po ovoj Odluci, bez zasnivanja radnog odnosa, omogućit će se: licima koja se nalaze na evidenciji Službe za zapošljavanje TK – Biro za zapošljavanje Gračanica koja imaju završen VII stepen stručne spreme ili visoko obrazovanje prvog, drugog ili trećeg ciklusa Bolonjskog sistema studiranja koji se vrednuje sa najmanje 180 ECTS bodova, sa prebivalištem na području grada Gračanica, a koja nisu obavljala stručno osposobljavanje u svom zanimanju.

#### Član 3.

Vrijeme stručnog osposobljavanja računa se u pripravnički staž i radno iskustvo utvrđeno kao uslov za rad u određenom zanimanju i može trajati najduže onoliko vremena koliko traje pripravnički staž.

#### Član 4.

Raspored lica na stručno osposobljavanje će se vršiti u javne ustanove, Općinski sud u Gračanici, privatna i javna preduzeća i druga pravna i fizička lica sa područja grada Gračanica, a koja iskažu potrebu za angažovanjem lica određene vrste zanimanja.

#### Član 5.

Ukoliko ne postoji iskazana potreba za određenim zanimanjem zainteresovana lica koja ispunjavaju uslove iz člana 2. ove Odluke, mogu sama iznaći načina za angažovanje u

pravnom ili drugom subjektu na području Grada Gračanica, koji su spremni tom licu omogućiti obavljanje stručnog osposobljavanja pod uslovima koji su utvrđeni ovom Odlukom.

#### Član 6.

Odabir i raspored osoba sa VSS izvršit će se na osnovu javnog poziva.

Javni poziv za prijem lica visoke stručne spreme na stručno osposobljavanje bez zasnivanja radnog odnosa objavit će u sredstvima javnog informisanja (web stranica i oglasna ploča Grada Gračanica, Radio Gračanica, oglasna ploča Biroa za zapošljavanje) i provodit će se na godišnjem nivou.

Postupak po raspisanom Javnom pozivu provodit će Služba za upravu, društvene djelatnosti, boračko invalidsku zaštitu i zajedničke poslove.

#### Član 7.

Prednost imaju kandidati koji su duži period na evidenciji nezaposlenih osoba kod Biroa za zapošljavanje Gračanica nakon sticanja VSS, kao i kandidati čija prosječna ocjena tokom studiranja iznosi 9,0 i više bez obzira na dužinu čekanja na zaposlenje kod Biroa za zapošljavanje Gračanica.

#### Član 8.

Ukoliko na Javnom pozivu ne bude dovoljno prijavljenih kandidata angažovanje na stručno osposobljavanje vrši se na osnovu zahtjeva kandidata, a u skladu s sredstvima predviđenim u budžetu Grada Gračanica.

#### Član 9.

Finansijska sredstva za stručno osposobljavanje bez zasnivanja radnog odnosa nezaposlenih osoba sa područja grada Gračanica obezbjeđuju se u budžetu Grada Gračanice za svaku budžetsku godinu.

Broj angažovanih lica ovisit će isključivo o visini sredstava planiranim za te namjene u tekućoj budžetskoj godini.

#### Član 10.

Nezaposlena osoba na stručnom osposobljavanju bez zasnivanja radnog odnosa ima pravo na zdravstveno osiguranje, u skladu s propisima koji važe za nezaposlene osobe, kao i na osiguranje za slučaj povrede na radu i profesionalnog oboljenja, u skladu s propisima o penzijskom i invalidskom osiguranju, te naknadu u skladu sa Odlukom koju donosi Gradonačelnik.

#### Član 11.

Daje se saglasnost Gradonačelniku da nakon provedenih procedura zaključi ugovore o stručnom osposobljavanju sa pravnim subjektima, kojima će se bliže regulisati međusobna prava i obaveze u pogledu finansiranja i prihvatanja lica na stručno osposobljavanje.

Gradonačelnik je ovlašten poduzeti i druge mjere u cilju uspješnije realizacije programa stručnog osposobljavanja bez zasnivanja radnog odnosa nezaposlenih osoba sa područja grada Gračanice.

#### Član 12.

Odluka stupa na snagu danom objave u „Službenom glasniku Grada Gračanica“.

PREDSJEDAVAJUĆI  
GRADSKOG VIJEĆA  
Mirza Okić

## OBRAZLOŽENJE

### PRAVNI OSNOV

Pravni osnov za donošenje Odluke:

Član 34. Zakona o radu Federacije BiH („Službene novine Federacije BiH“ broj : 26/16, 89/18,44/22 i 39/24) kojim je propisano :

(1) Ako je stručni ispit ili radno iskustvo utvrđeno zakonom ili pravilnikom o radu uvjet za obavljanje poslova određenog zanimanja, poslodavac može lice koje je završilo školovanje za takvo zanimanje primiti na stručno osposobljavanje bez zasnivanja radnog odnosa.

(2) Vrijeme stručnog osposobljavanja iz stava 1. ovog člana računa se u pripravnički staž i radno iskustvo utvrđeno kao uvjet za rad u određenom zanimanju i može trajati najduže onoliko vremena koliko traje pripravnički staž.

(3) Ugovor o stručnom osposobljavanju zaključuje se u pisanoj formi.

(4) Poslodavac dostavlja kopiju ugovora iz stava 3. ovog člana u roku od osam dana nadležnoj službi za zapošljavanje, radi evidencije i nadzora.

(5) Lice na stručnom osposobljavanju ima pravo na zdravstveno osiguranje kako je to utvrđeno propisima za nezaposlena lica, a prava po osnovu osiguranja za slučaj povrede na radu i profesionalnog oboljenja osigurava poslodavac u skladu sa propisima o penzijskom i invalidskom osiguranju.

(6) Licu za vrijeme stručnog osposobljavanja osigurava se odmor u toku rada, dnevni odmor između dva uzastopna radna dana i sedmični odmor.

Član 13. Zakona o principima lokalne samouprave („Službene novine Federacije BiH“, broj: 49/06 i 51/09) i član 16. Statuta Grada Gračanica („Službeni glasnik Grada Gračanica“ broj: 01/23), kojima je propisana nadležnost Gradskog vijeća.

### RAZLOZI DONOŠENJA

Razlog za donošenje ove Odluke jeste potreba da se mladim i visokoobrazovanim nezaposlenim osobama sa područja Grada Gračanica omogući sticanje prvog radnog iskustva kroz stručno osposobljavanje bez zasnivanja radnog odnosa, u skladu s odredbama Zakona o radu Federacije BiH, čime se osigurava pravni okvir za njegovo sprovođenje.

Sredstva za realizaciju programa biće planirana i obezbijedena u Budžetu Grada Gračanica, dok će broj angažovanih osoba zavisiti od visine raspoloživih sredstava u budžetskoj godini.

Prijedlogom Odluke o obavljanju stručnog osposobljavanja nezaposlenih osoba visoke stručne sprema sa područja Grada Gračanica nastoji se sistemski omogućiti mladim i obrazovanim osobama, koje su evidentirane u Službi za zapošljavanje Tuzlanskog kantona – biro Gračanica, a koje nemaju radnog iskustva u struci, da obave stručno osposobljavanje bez zasnivanja radnog odnosa.

Predlažemo da Gradsko vijeće usvoji Odluku u predloženom tekstu.

PREDLAGAČ  
GRADONAČELNIK  
Sadmira Džebo